

DISPUTATIO MEDICA INAUGURALIS;

SISTENS

TUMOREM
PRÆCORDIALEM
INTERNUM,

QUAM

EX DECRETO FACULTATIS GRATIOSÆ,
ADSISTENTE DIVINA GRATIA,

PRÆSIDE

D. ALEXANDRO CAMERARIO,

THEORIÆ AC PRAXEOS PROFESS.
ORDINARIO,

PROMOTORE AC PATRONO SUO VENERANDO,

PRO LICENTIA

SUPREMOS IN MEDICINA HONORES ATQUE PRI-
VILEGIA DOCTORALIA LÉGITIME
CAPESSENDI,

PUBLICO ERUDITORUM EXAMINI
SUBMITTIT

BERNARDUS RAU, URACENS.

AD D. DECEMBR. ANN. MDCCXXXIV.
LOC. HORQ. CONSUE'T.

TUBINGÆ,

Typis ANTONII HENRICI ROEBELII.

Digitized by the Internet Archive
in 2019 with funding from
Wellcome Library

<https://archive.org/details/b30779005>



Σ. Θ.



Nemo tenetur propriam allegare turpitudinem. Regularum Juris alias quidem non adeo gnarus, hujus tamen non semel auditæ recordor, scripturus historiam affectus, quem ipse nec cognovi, nec curavi, & post insignem annorum plusculorum intercapedinem miror adhuc potius atque rimor, quam penitus exploratum habeo. Quem propterea ante hos fere duodecim annos ad *Naturæ Curiosorum Ephemerides* transmissi, & ab Academiae Dn. *Præsidi Illustri & Magnifico* ejusdem Actorum Physico Medicorum Volumini primo benevole insertum postea deprehendi, neque vero Excc. Dnn. Collegarum quemquam in Voluminibus, quæ interea prodierunt, Secundo & Tertio, aut alibi, vel animi sententiam super istum exposuisse, vel analogum qualemcunque casum proposuisse; imo potius, ut ipse plenius exponam istum, quosdam per litteras huc scriptas optasse, & adhucdum expectare, cognovi. Hunc ipsum igitur, occasione nunc data, in disputationem publicam vocare non subterfugio, sed dignum omnino censeo, cui similes ex historia medica conquiram, tentaturus, num ad illustrationem mutuam forte possint in vicem conferri, & phænomena satis utique singularia declarari.

Fuit autem affectus ille *Tumor præcordialis internus*, visu tamen atque tactu facile agnoscendus, arteriarum instar pulsatorius, incerta de causa occulte subnatus, nec sine molestia diu, per triennium, gestatus,

medicamentis tam internis quam externis curari frustra tentatus, tandem sponte feliciter solutus.

Hunc obtulit *vinitoris uxor* paupercula, annorum ultra triginta, eousque sana, quinque liberorum mater, quæ bis terve ipsa, sæpius vicina & maritus, mihi retulit quæ sequuntur.

Ex *Phænomenis antecedaneis* dubium erat ipsius *principium*, ratione causæ & occasionis. A marito voluit accusari *levatio ponderis* & gestatio, quam tamen in dubium vocavit uxor, substituens potius *emansione* aliquando *mensium*, cum statu vertiginoso, verno tempore; circa quod liberorum quoque minimus ante annum natus obierit, addens: Se jam diu ægre tulisse, si quid epigastrio incubuerit gravius.

Cum igitur a vere in ætatem observasset atque tolerasset *sensim* occulte, non acute, nec *inflammatorie*, aut cum aliquo corporis morbo, tumorem incrementem, mihi primum exposuit, ac notanda suppeditavit *phænomena hæcce constituentia, conjuncta & concomitantia*:

Locus erat Epigastrii medium, sub ipso cordis scrobiculo, utrinque inter costas anticas infimas. *Tumor* ipse ad tactum interne subtus circumscriptus, duriusculus, indolens, nisi premeretur fortius. *Magnitudinem* habebat pomi majoris; progressu mensium, quin annorum, modo persistere in eodem, modo increvisse dictus; *Non mutato* externæ regionis colore. *Pulsare* non tam ipsum æque tumorem, quam spatium super & inter ipsum atque costam proximam (ubi & ad tactum duriorem non ferebat) & ægra ipsa, de hoc non semel querula, & admota manus mea sensit, dum de cordis suo loco pulsatione quæsita nihil scire vellet, atque negative responderet; Non semel vero hoc insuper adderet: *Pulsare fortius* a motu quocunque omni, inprimis ab adscensu adclivi, ac terrore; In plano procedere facilius, multo minori cum molestia. Imo sentiri a motu quandoque tumoris allisum ad costam ægriorem.

Decubitus commodior in latus dextrum; Supinus, & sinister, vel non, vel ægre ferendus; Seditis autem situs corporis antrorsum inclinatus. Progressu tamen temporis etiam in latus sinistrum cubatura nihilominus quiescere potuit, comprimendo saltem prius manu locum illum, atque ita quasi fulciendo tumorem, quem sub costas fere tunc recedere observavit.

Accessit post quadrantem anni, per quem cum tumore suo quasi sana vixerat, forsan ex ratione vitæ generis pauperculi & duriusculi, *dolor* quidam

dam lateralis, per sinistrum magis, qui licet absque vel horrōre vel calore subsequo fuerat, uti quidem neque tunc neque post æque solebat febrecitare, ipsam tamen graviter afflixit, & in lectum deiecit, ut decumberet ægrius, respiraret difficiliter, absque tussi tamen omni.

Medicamentorum usu mitigari potuerunt hæ querelæ, ut, præter pristinas de tumore jam consuetas, non superessent magnæ & multæ, sed ægra facile iterum respiraret, adpeteret, deglutiret, cibum non nisi ægro illo tempore ægre ferret, menstruaretur usque constanter, utut inæqualiter. Alvus libera. Pedes non tumidi.

Interim temporibus sequentibus aliquoties adhuc ita correpta & dejecta fuit; Toties tamen se recolligens, atque passionibus superatis ad œconomiæ curam rediens. Cum autem viveret in jugi metu, ob tumorem adeo suspectum non minus ac molestum, dubium sæpe fuit, quid huic debeatur, quid morbo. Certe anno altero & tertio admirationi fuit omnibus, corpore non consumta, facie non pallida, tumori patienter tolerando sensim adsueta. Majo tamen anni tertii sanguis ex brachio missus vesperti caseum exhibuit, crusta spissa fœda tectum, multoque sero turbido innatantem.

Rebus ita varie se habentibus, tumore tamen semper in eodem permanente, hoc ipso anno tertio concepit iterum, gestavit & peperit feliciter filiulam superstitem.

Sed ad finem historiæ, quem exitum habuerit. Per aliquot annos nihil amplius de ipsa inaudiveram, ut ejus fere fuerim oblitus, donec ipsa tandem rediret sponte, consultura pro filia. Solet enim ita fieri cum plebe, quæ medico semel consulto, si non statim inde singulariter proficiat, raro redit, vel vage admodum recurrit, & plane tandem emanet, ut quid actum cum ipsa fuerit, vix innotescat. Diu igitur dubie tum contemplatus ipsam, agnovi tandem, & quid actum interim cum ipsa fuerit, interrogavi; Ipsa vero rem obscuram ita narravit, ut capere quidem vix potuerim, fidem tamen ipsi non adhibere etiam non possim.

Scilicet, vel ab usu remediorum omnis generis undecunque oblatorum, vel longa tandem consuetudine, gestationem tumoris fuisse sibi tolerabiliorem, valuisse corpore melius, atque adeo concepisse & peperisse, ut dictum supra. Interim tumorem vel visum modo sibi, vel revera factum, fuisse molliorem.

Cum ergo post puerperii septimanas, verno tempore, occuparetur in vinea phaseolorum seminibus terræ committendis, venisse ex improvviso *tussim* quandam insolitam, vehementem, bina vice. Tunc subito, prævia quadam intus quasi *ruptura*, sibi *per os* erupisse materiam, nescio quam & qualem, multam, quam utraque manu capere non potuisset. Hanc negavit fuisse vel *cruentam* vel *purulentam*; Etiam quæsitâ, toties aliter non respondit, atque tandem comparavit cum ita dicta *matrice aceti & tunica*, ut ovi sine testa; sed inodoram & insipidam. Negavit porro excretionis actum fuisse *vomitionem*, sed constans asseruit *extussitionem*; Absque tamen ullo tunc suffocationis metuendæ sensu; Absque etiam dolore quocunque; Imo vero cum cessatione tussis statim ab exoneratione. Atque ita se *liberatam* fuisse momento temporis *plenarie, constanter*; Nec tum sensisse reliquias, vel recidivas symptomatum quorumcunque; Nec hæcenus pectore aut præcordiis quidquam mali passam.

Hæc sunt, quæ ad *Naturæ Curiosorum Acta Physico Medica* transmissi quondam, affectus historiam concernentia, remediorum abs me præscriptorum adparatu jamnunc breviter supplenda.

Mihi quidem quibus ante, juxta vel post mea, externis ac internis adversus tumorem istum usa fuerit, non plane constat; Consiliorum enim per tres annos variorum numerus fuit non parvus. Nec opus videbitur, quoniam frustra usurpavit pleraque. Tulit tamen inprimis bene, quin habere melius solebat ab illis, quorum bona fide mentionem faciam. Cum conjecturarum fuerint multæ, cogitatum inter alias fuit etiam de *Vermibus*, tanquam plebi frequentioribus, affectuum mirorum & occultorum auctoribus, vel ad minimum comitibus. Utique ab anthelminticis, non statim quidem, progressu dierum tamen, per intervalla fuerunt *exclusi* lumbricorum non pauci. Sed absque beneficio inde redundante in tumorem, nihil hinc mutatum. Fuit inter illa non uno ex capite, *causa* etiam *solida* occultiori convenire creditus, æthiops mineralis, ad drachmas duas, cum extractis cichorei, papaveris ac helenii, in pilulas redactus, dimidii scrupuli dosi. *Purgantia* mediocria data fuerunt non semel. Ad *mensium* tempus elixir aperitivum Clauderi, cum pulvisculis ex castoreo, myrrha, croco, & speciebus diacretæ. Alias *martialia*, tinct. mart. cydon. essent. mart. Ludov. cum *decocto viscerali* corticis fraxini, herb. scolopendr. trifol. fibr. radic. polypod. &c.

Nec

Nec prætermisit Vinitor *euporista* : *Infusum* theiforme, tam *melissæ*, *veronicæ*, *betonicæ*, quam *millefolii*. *Juscula* alterata *chærefolii*, *melissæ*, *sanguisorbæ* ; *Succos* expressos, modo *borraginis*, *buglossi*, *chærefolii*, modo *nasturtii aquatici*. *Decoctum* radicis *cichorei*. *Epithemata*, tam ex *chamomilla*, quam *nasturtio aquat.* cum *verbasco*, *meliloto*, &c. *Lienis vituli* cum *aceto*. Quibus ex officina pharmaceutica accessit, modo *nitrum*, cum *aceto* & *vini spiritu* ; modo *gummi ammoniacum* in *emplastro*, &c. Cæterum sub querelis dolorum, atque turbis febrium, habuit *nitrum* cum *absorbentibus*, atque *lenibus diaphoreticis* ; *Pilulas bezoardicas*, &c.

Jam ergo, sicut ante hos undecim & quod excurrit annos, ita nunc rursus quæritur : Quid hoc rei sit ? Quid, & ubi, tumor iste fuerit ? quodnam ipsi subiectum, quænam causa constitui vel adsignari, quomodo phænomenorum rationes reddi possint ? Ad quod expediendum dum me jam-jam accingo, omnium optime officio meo me defuncturum spero, si κατὰ πρότερον procedendo prius dicam, quid non fuerit ; Deinde κατὰ Θεσιν, vel tandem ὑποθεσιν tamen, subjungam, quid fuisse, ac ubinam hæsisse tam-diu, verosimiliter potuerit.

Fuit igitur tumor iste *primo non verminosus*. Non equidem est, quod me pudeat suspicionis de latentibus forte vermibus exortæ. Habeo rationes, quibus illam tuëar. Etenim non modo dudum in Eph. Nat. Cur. Dec. III. Annis III. & IV. asseruerunt *Menzelius* atque *Francus*, non esse corporis humani partem, in qua non reperti vermes fuerint ; Nec ex pectore cum tussi, vel ex ventriculo vomitu, rejecti latere quemquam possunt, postquam illos, jam a *Platero* Prax. L. III. adnotatos, suo quoque testimonio confirmarunt, tam *Lanzonus* in E. N. C. Dec. III. Ann. VII. & VIII. quam *Riedlinus* in suis Lin. Medic. qui sputum quoque verminosum ibidem recenset : Hos vero in Misc. Nat. Cur. Ann. III. *Schulzius*, annis proxime sequentibus IV. & V. *Hainius*, VI. & VII. *Paullini*, VIII. autem rursus idem *Schulzius*, tandem Dec. II. Ann. IV. *Polisius*, praxi sua observatos, descripserunt, quos observatione propria, hic quoque loci facta, facile si necessitas quidem id postularet augere possem. Verum etiam noti sunt, huc imprimis facientes, varii *Tumores a vermibus* exorti. Ut enim tumores & abscessus vermicondos taceam, quos recenset *Garmannus* de mirac. mort. l. 3. t. 1. Nec de vermibus in globum convolutis *Ejusdem*

ex M. N. C. Ann. I. (cui ad latus poni merentur vermes intestina perforantes, tam *Ejusdem* ibidem, pag. 321. quam ad h. l. notatus *Dethardingii* parallelismus in E. N. C. D. III. Ann. V. & VI. App. p. 151.) vel de globo pituitoso, magnitudine ovum anserinum adæquante, vermibus pilosis farcto *Paullini*, in E. N. C. Dec. II. Ann. VI. App. vel tumoribus herniosis in inguine a vermibus excitatis, ac E. N. C. Dec. II. Ann. I. Obs. 126. atque Dec. II. Ann. III. Obs. 141. descriptis; aut abdominis tumore verminoso, quem supra laud. *Lanzonus* E. N. C. Cent. I. communicavit; atque vermibus vesicularibus seu hydatodeis in caprearum omentis ab *Hartmanno*, fide E. N. C. D. II. A. IV. repertis, quidquam dicam. Mereretur forte tamen cum nostro comparari verminosus ventriculi tumor cum folliculo, quem in nunquam satis laudando observationum medicarum promptuario, graphice pro more ac solide, cum Scholio quoque, dedit nobis in E. N. C. Dec. II. Ann. VII. *Wepferus*. Cum qua conferri poterunt tam *Ejusdem Wepferi* Obs. I. anni statim proxime sequentis II. VIII. quam obs. cclv. Dec. III. Ann. V. & VI. atque obs. ccxxix. Act. Phys. Med. Nat. Cur. Vol. I. Quæ si vel maxime dicantur in canum modo luporumque ventriculis deprehensa, homini tamen simili omnino ratione possent contingere, prouti ex monstroso mammæ, ac inprimis altero, non minus magno, lateris in abdomine sinistri tumore a vermibus excitato adparet, quem *Rommelius* E. N. C. D. III. A. II. dedit, nescio qua de causa in *ejusdem* Dec. III. Ann. IV. repetitum.

Quicquid tamen sit horum omnium, quantumvis etiam, ut in historia dictum, anthelminticis datis lumbrici fuerint expulsi, atque alia adhuc plura adduci possent, tumor tamen noster nec a vermibus excitatus formatusve, nec expulsis hisce quidquam vel adjutus vel mutatus, adeoque illis etiam nullo modo adscribendus est.

Neque *secundo* tumor noster fuit *Anevrysmalis*. De anevrysmate cogitandi ansam dare quidem poterat motus iste pulsatorius, quo tumor nostræ singulariter inclaruit. Etenim anevryσμα (quod promiscue per jota etiam plerique scribunt hodie, incurii censuræ, quam Instit. suarum L. III. C. 154. habet *Casp. Hoffmannus*) cognoscitur, inquit *Jonstonus* in *Idea Univ. Medic.* L. VI. C. VIII. p. 288. quod sit tumor mollis, pulsans, atque digitis plerumque cedens; ad minimum quamdiu recens, adhuc intra terminos arteriæ saltim dilatatæ subsistit. Unde *Idem* loc. cit. statim subjungit:

jungit : Si majus fiat , nec digitis amplius cedere , nec pulsare , sed aquæ bullientis instar strepitum saltim edere. Quod ipsum tamen non a tumoris magnitudine , sed a conclusi sanguinis vel fluxilitate diutius continuata (cui tantum tribuit in sua de Anevrysm. Disp. Antecessor quondam de Universitate non minus ac Facultate nostra bene meritus B. *Mezgerus*) vel coagulatione & concretionem citiori derivat , & exemplo circa talum exorti talis anevrysmatis , nucem juglandem magnitudine non excedentis , minime tamen pulsantis , confirmat *Ruyfchius* in Observ. Anat. Chir. Centuria , obs. 38. Sed & jam dudum ante ipsum ex *Ballonio* notandum inculcavit *Bonetus* Sepulchr. L. II. S. XI. p. m. 675.

Quamvis autem apud scriptores medicos dubio omni careat, anevrysmata causa tam interna quam externa oriri posse , neque pectoris scrinio cordisque viciniae adstringi , sed ut passim alibi , sic imprimis etiam circa ventriculum & lienem , vel , ut *Fallopium* verbis proferam , in abdomine & hypochondrio sinistro , frequenter observari , prouti e. g. *Bonetus* loc. cit. L. III. S. VII. p. 785. arteriæ coeliacæ anevrysmata , quod pugnum compressum admitteret ; *Drelincurtius* in d. Lienos. arteriam lienarem fornicatam , cum anevrysmate polypofo in pectus ac abdomen æqualiter protenso ; Et Exc. Dn. D. *Schulze* in Act. Phys. Med. N. C. Vol. I. anevrysmata verminosum in arteria mesoecolica equæ , notarunt atque descripserunt : Quamvis etiam bene recorder observationis illius alterius quam supra laud. *Romelius* communicavit in E. N. C. Dec. II. A. VII. de anevrysmate magno , nullis cedente remediis , tandem sponte tamen evanescente ; quo cum conferri meretur , quod tam ex praxi propria *Baglivus* d. Fibr. Motric. L. II. C. IV. quam ex *Bartholini* Observ. Cent. IV. *Wedelius* allegat in Disp. sua de anevrysm. Quamvis denique , (quoniam materia nostræ per os rejecta non fuit cruenta) nec illud me subterfugiat , quod ex *Vesalio* notat *Schenckius* , in anevrysmatibus non semper sanguinem reperiri , sed quandoque humorem concretum instar glaciei , aut humoris crystallini , interdum veluti sanguinem concretum , aut molam ; cui conforme prorsus est , ad nostrum huncce casum imprimis quadrare visum , quod in *ογκολογία* sua parva ex obs. *Bartholini* aliorumque refert *Schelhammerus* : Mirum est , inquit , carnem quandoque massam ex sanguine concrevere , cordi similem , pulsantem ut cor. Quales quidem istiusmodi tumorum substantias , sive humorosa sive car-

B

nosa,

noſa, cartilaginea aut adhuc ſolidior fuerit, tanquam in arteria ſaltim dilatata concretas, laud. *Mezgerus* Diſp. cit. ad anevryſina modo ſpurium refert, membranæ non interioris ſolius, (.quippe tanto robuſtioris, ut abſurdum Ipsi, quin impoſſibile videatur, iſta rupta debiliorem externam poſſe reſiſtere ac integram manere.) ſed utriuſque ruptura, atque ſanguinis contenti effuſione in muſculorum, membranarum veſ cujuſcunque partis interſtitia, verum anevryſma fieri, contra ſcriptores ſui ævi celebriores, *Fernelium*, *Hildanum*, *Sennertum*, *Horſtium*, *Riverium*, &c. cum *Galeno* Græcorumque atque Arabum pleriſque contendens.

Quamvis, inquam, iſta quidem omnia ita ſeſe habeant, ad tumorem tamen noſtrum illuſtrandum parum, aut nihil faciunt; Neque cum phænomenis, ac eventu præcipue, tumoris conciliari facile poſſunt. Imo, præter unicum forte pulſationis phænomenon, reliqua plane non conſpirant. Enimvero, ſicuti non omne anevryſma pulſare ex *Boneto* atque *Ruyſchio* antea notavimus: Ita nunc ulterius animadvertendum commendamus, ut rem inter Mediſcos prudentiores dudum conſectam, ſcilicet non omnem iſtiusmodi pulſum inſolitum anevryſma ſtatim ſignificare. Phænomenon eſt admodum frequens, quod cauſas habere poteſt oppido diverſas. Operæ pretium erit, aſſertum per ſpecimina comprobare.

A nativitate, propter inſolentem cordis ſitum, pulſationem perennem habuit, in *dextro* quidem *pectore*, tam typographus *Wedelii*, quam ſicarius *Patini*, a *Bartholino* in Act. Hafnienſ. Vol. II. ac Hiſt. Anat. Cent. II. deſcripti; Atque forſan Catharina Medicea, Ludovici XIII. Galliarum Regis mater, præter quadragenarium adhuc alium, a *Riolano* in Anim. ad Bauhin. juxta cum ſcœmina abs *Mællenbroccio* in M. N. C. Ann. II. O. LXXVI. notata. In *hypochondrio* autem *ſiniſtro* puer *Hannemanni*, deſcriptus in E. N. C. D. II. A. VIII. O. CXIV. cujuſ parallelismus ex anno proxime ſeq. IX. inter parerga *Fabri* merebitur forte huc tranſcribi totus, quia brevis & jucundus. “De pulſu hypochondriorum, qui nihil aliud eſt, quam motus arteriæ magnæ, in affectibus certis, etiam in ventre perceptibilis, nunquam ſine gravi momento. Interim admonet nos hæc hiſtoria migrationis mirabilis, Rationis e capite ad præcordia, quam manifeſte ſe paſſum eſſe *Helmontius* aſſeuerat, tract. Idea Dem. Senſi, inquiring, aperte, dilucide, diſcursive & conſtanter, totum illud munus (intellectum) obiri in præcordiis, & expandi circa os ſtomachi,

machi, & cum exclusione quidem capitis. Et paulo post: Cum amen-
tia sit defectus intellectualis, ita proin suscitatur ex hypochondrio &c.
Quid demum fieret, si sensus in præcordia, cor vero in hypochondria
migraret? Nemo igitur moraliter exprobet cuiquam, cui naturaliter ac-
cidit, *dass ihm das Herz in die Hosn gefallen.*,,

In *juventute* demum cor situm adhuc mutasse suum, atque fortiter
palpitasse in *epigastrio* ac *hypochondrio*, docemur a *Platero*, *Sidobre* ac
Lancisio. Hic enim in suo d. mort. subit. tr. L. II. illorum qui perierunt,
obs. II. juvenem recenset cursorem, cujus ultra annum pulsatile quoddam
pondus supra diaphragmatis centrum, post mortem sectione deprehensum
est fuisse cor, mole triplo naturali majus, vaccinum longe superans, quod,
relaxatis exesisque proximioribus membranarum funiculis, plane supra
diaphragma ceciderat, ibidemque oesophagum, aortam ac ventriculū
premebat. Ille in tr. d. Variolis p. m. 94. juvenem allegat, tam violenta
cordis palpitatione correptum, ut cor, cum appensis vasīs & pericardio,
e sua sede fuerit depulsum, & super diaphragma ceciderit, ad latus cartila-
ginis ensiformis, in quo videnda tangendaque erat pulsatio, ibique promi-
nebat costarum cartilago. Iste vero observ. suarum Libr. III. adolescen-
tem asciticum refert, qui puer adhuc frequenter utraque manu terræ in-
nixus corpus in altum erigendo rotans, cœpit cordis palpitationem ac pul-
sationem vehementem sentire in sinistro latere, circa ventriculi fere regi-
onem, quam a corde, eousque propendente, profectam fuisse sectio post
mortem declaraverit.

Utrum huic, an vero primæ? classi debeat adscribi rara cordis palpi-
tatio, quam *Ant. de Pozzis* communicavit M. N. C. Ann. IV. & V. O.
XL. ambigere quis posset. Dicitur enim vir juvenis a quadriennio palpi-
tatione cordis continua correptus, atque tandem syncope abreptus, corde
non in loco proprio, sed circa diaphragma, lateris sinistri, loco valde de-
misso, palpitante. Sed post mortem deprehensum cor maximum, totum
emaciatum, unico saltem ventriculo constans, hoc autem XVI. sanguinis
uncias comprehendens, &c.

Pulsationes reliquæ, quas magno numero apud Autores deprehen-
dimus, sunt pleræque omnes vel *obstructoriæ*, vel *constrictoriæ*, forsitan
etiam *inflammatoriæ*, aut commotoriæ *sanguinis orgastici*, vel ab extenu-
atione corporis *hæctica*. De primo *Wedelius* loc. cit. scribit: Non omnis

pulsus insolitus statim anevryisma notat, sed sæpe solum obstructionem; uti pulsationem in epigastrio, in hypogastrio, in hypochondrio sinistro, notavimus absque anevrysmatis caractere. Quid hoc aliud est, quam *οι πονοι παλμωδεες Drelincurtii*, quos l. c. scribit observari vel in universo corpore, vel ad tempora, vel in toto abdomine, vel in hypochondriis, vel ad umbilicum. Cui plane conformiter ex *Willisio Bonetus* ait l. c. p. 189. propter lienis obstructionem fieri sanguinis regurgitationem, atque pulsationem istam excitari, quæ in hypochondriis subter ventriculum sentitur. Et pag. 199. ex *R. I. Forti*: Pulsationum istarum causam in obstructiones contumaces ac insignes, non mesenterii solum, verum quoque pancreatis vasorum, præcipue referendam. Ad constrictionem spasmodicam pertinet observ. Exc. D. D. *Heisteri*, quæ legitur in E. N. C. Cent. I. & II. p. 432. de musculis rectis, in abdomine adeo introrsum tractis, ut aortæ lumborumque vertebri proxime incumbentes, in vita pulsus arteriæ magnæ necessario digitis percipiendum dederint; quod in rustico dormitore batavo, *de Slaapende Boer tot Stolwyck* dicto, contigisse Idem ibidem memorat. Sub inflammationis suppuratione dolorem, qui tum una cum febre major fit, juxta aphor. 47. Sect. II. fieri pulsatorium, & arteriarum fere pulsus atque undulationes exprimere, quis est qui ignorat? Sed quis est etiam, qui non condoleat *Boneti* puello decimestri, cui abscessus, mediam pectoris sinistri partem occupans, cor propria dimotum sede in adversam sic propulit, ut hoc pulsare fortiter in dextro, ille in sinistro latere, deprehenderetur tribus ante mortem septimanis. Commotiones sanguinis orgasmicas laud. *Bonetus* accusat, dum occasione alicujus anevrysmate laborantis melancholici pag. 199. scribit: Sæpe pulsatio percipitur in hypochondrio sinistro, quæ manum admoventibus tum inprimis sentitur, cum meri potu exercitiove incalescunt, aut in iram feruntur. Contingit hoc in arteria præsertim coeliaca, nec tamen hac sola; nam aliquando omnes pulsant, ob vehementem æstum, præsertim per horas aliquot a sumto cibo, vel ab immodico motu. Et de hypochondriacis brevi ante dixerat: Illos interdum aliquot horarum spatio se febricitare falso putare, quod ab assumto cibo, vel corporis motu, propter æstum, arteriæ omnes ipsis immodice soleant pulsare. Tandem corporis extenuationem hecticam, & ab hac in linea alba conspectum arteriæ magnæ pulsus graphice, uti potest & solet, depingit, adductaque ex *Bontio* historia consimili declarat, qui obser-

observationum scite conscribendarum exemplar Studiosis proponi mereretur, *I. N. Pechlinus*, Obs. Med. L. II. O. VI.

Tertio, partium ibi subtus jacentium, quibus respondere situ suo videbatur extus *tumor* iste, *non fuit talis, quales* ipsis alias obtigisse varios aliunde constat. Prima, cujus ratio hic haberi posset, est *Ventriculus*. Hunc chloroticis, a febre refurgentibus, atque aliis passim, flatibus turgescere, ac in tumorem epigastrium elevare, in vulgus notum, sed a nostri tumoris modo prorsus alienum est. Circa orificium ejus sinistrum internum tumorem tantum, ut gulæ viam penitus occluderet, ac fame sitique ægrum enecaret, in viro robusto Ducatus nostri, quondam observavit *Febrinus*, ac historiam ejus dedit in E. N. C. D. II. A. VIII. O. XCVI. recte provocans ad similem, in gula fœminæ ab *Hannemanno* notatum, ac in ejusdem Dec. II. Ann. III. Obs. XLVII. una cum Scholio *Schræckii*, legendum. Alius, non minus gravis, circa dextrum ventriculi orificium reperti, meminit *Harderus* in E. N. C. Dec. II. Ann. VI. & recordabimur nos iterum infra, ubi de pancreate sermo nobis erit, quoniam utriusque mentionem in observationis titulo Autor fecit. Scirrhum ventriculi lethalem, pugni magnitudine, materia tenaci atra refertum, in ejus fundo sessilem, *Ruyfchius* cit. obs. anat. chir. nr. XXXIX. atque alium, pro rana viva, ventriculi inquilina, ab ægro habitum, ovi gallinacei magnitudine, pyloro proxime adnatum, *Bonetus* recenset Sepulchr. L. I. S. IX. p. 197. Qua occasione tamen in transitu notandum, non tam a tumore ventris aut corporis quocunque, quam potius a borborygmis atque murmurationibus abdominis, sub specie coaxatus, rugitus, grunnitus, vel ululatus forte percipiendis (quos quidem sonoris modo, per flexuram sub hypochondrio sinistro compressi, coli flatibus in Eteodromo suo verosimilius adscripsit *Lentilius*; Imo post mortem adhuc in cadavere, non colo saltim, sed ventriculo ac omnibus intestinis reliquis ita turgidis auritus testis deprehendit *Reiseli*us, juxta E. N. C. D. II. A. VII. O. XIII.) existimasse quosdam, se vivi quidpiam alere in suo corpore; quod etiam de medicinæ Doctore *Plateri* Obs. L. I. potius, quam simpliciter ipsum fuisse melancholicum, credidero.

Ventriculo connectitur *Omentum*, quod istiusmodi tumoribus quoque non semel sedem præbuit atque fundamentum. Hoc non loco fuisse suo, nec expansum modo consueto, sed corrugatum, atque supra ventri-

culum ad diaphragma sursum trusum, refert *Mercklinus* E. N. C. D. II. A. I. O. CLXXXIII. Omentum scirrhosum, totam epigastrii regionem occupans, & quatuor digitorum transversorum crassitiem adæquans, in canonico monspeliensi a *Riverio* observatum, ex hujus Praxi citat *Hoffmannus* in Disq. Corp. anat. pathol. spec. II. §. 18. Omentum conglobatum, atque glandulis mirum turgidis ita suffertum, ut foemina credita fuerit modo hydrope laborare, modo foetum mortuum gestare, cujus caput, crura &c. tangi viderique possint, ex communicatione amici E. N. C. D. II. A. X. inferuit noster quondam *Reiseli*. Tumorem pugni magnitudine, præter paucam materiam albam, pultaceam, inodoram, nil nisi glumum durum ex capillis crispis intricatisque continentem, in hydropicæ omento crasso carnosoque, & peritonæo firmiter adhærescente, deprehendit ærique incisum exhibuit laud. *Ruyschius*, Obs. Anat. Chir. nr. XVIII. quin imo singularem & oppido rarum hydropem saccatum, omento conclusum, ex *Welschii* Obs. Med. Epis. cit. loc. allegat *Hoffmannus*.

Hepar, dextri quidem inquilinum hypochondrii, quandoque tamen etiam protendi ad epigastrium, & hoc in tumorem elevare, constat ex *Riverii* Obs. Med. & Cur. Insign. Cent. II. O. LIII. ubi tumorem scirrhosum hepatis recenset, quem pro abscessu in musculis epigastrii latente primum habuerit, quod sub cute statim tangeretur, isti tamen concolor, nec dolorificus, nisi cum tangeretur duriuscule compressus. Deprehendisse vero post mortem, tumoris causam continentem fuisse Hepar, tumoribus scirrholosis, & magna ex parte suppuratis, refertum; præter & ultra quos, in extremo ejus ambitu, versus epigastrium, adnati fuerint duo tumores cancrofi, ad umbilicum usque prominentes, pugnum magnitudine æquantes, ideo non in hepate esse olim crediti, quia non erant in loco hepatis naturali, sed prominentes magis, quam reliqua hepatis substantia, quæ seorsim ab illis tumoribus suo loco tangi poterat. &c. Conferri cum hac historia valde singulari merentur, non saltim Hepatite defunctorum extispicia, sub *B. Parentis* præsidio Disp. Inaug. quondam a *Brunnero* proposita; Nec non Hepatocele laud. *Reiseli* in E. N. C. D. II. A. VII. atque *Wolfstrigeli* in ejusdem obsf. medd. promptuarii A. II. O. LXXXVIII. Verum inprimis etiam tumor hepatis ab *Hollerio* notatus, qua parte musculi recti ad sternum pertinent, in ægro vehementer emaciato multum eminens, atque digitis cedens, ut pro abscessu in musculis rectis haberi

haberi diu voluerit, tandem tamen ab illa Hepatis parte, quæ illuc per-
tingebat, ortum sumxisse suum sectione post mortem deprehensus, prouti
ex Ejusd. libr. propr. obs. XXX. refert *Bonetus* p. m. 1047.

Pancreas quidem (non enim vacat; nec lubet, de hepate plura cū-
mulare, atque omnia corradere, quæ huc spectare tamen aliis forte vidē-
rentur.) sub ventriculo profundius ita situm est, ut non quivis tumor
ejus desuper statim tangi, multo minus oculis usurpari possit. Unde no-
tum est, quam prudenter & circumspēcte in detegendo ejusdem scirrhi,
forte nondum adeo nec magno nec inveterato, quippe medicamentis in-
ternis, fōtuque ac semicupio externis, feliciter curato, *Riverius* lese ges-
serit; Hypochondriaci sui vicennalis regionem ventriculi sollicite contrē-
ctans, & eam satis quidem tractabilem inveniēns, quoties suspēsa manu
aliquantulum modo tangeret; postquam vero penitus hanc adigeret, at-
que satis fortiter epigastrium comprimeret, duritiem ac renitentiam quan-
dam profundius ac sub ventriculo deprehendens, quam in pancreate residere,
hujusque durum & scirrhosum tumorem esse pronuntiavit. Nihilominus
tamen, ut hujus quoque mentionem faciamus, monet nos *Harderi* rustica,
cui, cum 45. æt. anno catamenia subito subsisterent, tumor in epigastrio
subnasci coepit, atque incrementa sensim tanta sumsit, ut tota tandem
ventriculi regio distenta ne contactum quidem leviozem ferret amplius.
Dicebatur autem, epigastrii regionem explorantibus, oblatum fuisse corpus
durum, quod a sinistris dextrorsum, & abhinc sinistrorsum protrudere,
atque versus latus dextrum adhuc alterum tumorem renitentem tangere
licuerit, qui ad adtactum duriusculum, non sine dolore quidem atroci at-
que ructibus, digitis comprimētibz cesserit. Etenim sectione post
mortem constitit, tumoris utriusque causam fuisse pancreas, undique
scirrhosum & tumidum, cum pyloro simul insigniter tumēte scirrhoso-
que, ac in extima superficie vomice aliquot albente pure refertis obfesso,
sic, ut interna quoque ventriculi facies scateret undique glandulis albican-
tibus, similiter induratis ac scirrhosis, quarum aliæ latiores & depressæ
magis, aliæ minores, sed eminentiores. &c. prouti hæc omnia fusius re-
censet laud. *Harderus* loco jam superius alleg. nim. E. N. C. D. II. A. VI.
O. CI. brevique post, ejusd. Ann. Obs. CXXXI. repetit *Mejerus*. Sed nec
hujus partis recessus ac tumores cumulo omnes. Evolvat, cui volupe
& otium est, apud *Tulpium* Obs. Med. L. IV. C. XXXIII. pancreas infra
supra-

supraque extuberans, pure sordido ac pituita viscida infarctum. Apud *Riolanum* Anthropol. L. II. C. XVI. pancreas hepatis molem æquans, totum scirrhum, multisque globulis ovi columbini specie farctum. Apud *Hildanum* Obs. Cent. I. nr. LXXI. tumorem pancr. scirrhum qf. steatomaticum, duorum pugnorum magnitudine deprehensum. Misc. Nat. Cur. Ann. I. Obs. XCIX. *Hertodi* de pancreatis ulcere cancroso. atque alia plura. Pergendum enim nobis, ac dicendum paucis etiam aliquid est de causa occultiori solida, cujus mentionem fecimus in historiae therapia. Ausim igitur ulterius hanc quoque thesin ponere:

Quarto tumor nostræ non fuit *solidus, carneus, fibrosus*. Excrementiarum & concretionum istiusmodi carnearum ac solidescantium specimina passim suppetunt, quæ, si vel maxime non in omnibus, in quibusdam tamen, convenientiæ non parum habere, adeoque analogiam quoque cum nostro magnam probare, videntur. *Ventriculi Verrucam Avenzoar* modo satis ingenioso detexisse refertur a *Boneto* in quodam, qui non digerebat cibum, febricitabat febre inordinata, fortiter aliquando invalescente, & aliquando debilitabatur, & habebat solutionem non magnam, & egestionem illæ coloris erant varii, adeo ut non posset cognoscere causam suæ ægritudinis. Cum attigisset pulsum ejus, invenit ipsum inordinatum & magnum, unde cognovit, quod apostema erat in membro multorum nervorum; Et specialiter, quia erat ferrinus, & debilitas virtutis patientis obviabat magnitudini ipsius pulsus, quæ manifestabant, verrucam esse in ipso stomacho. Et quia non erat multæ velocitatis pulsus, signum erat manifestum, quod non erat de genere calidorum apostematum. Et cum posuisset manum super fundum stomachi, invenit duritiem ad quantitatem unius pomi, absque sensu doloris; fortiter autem compressa manu, sensit modicum doloris, atque ex iterata compressione fortius dolebat. Quadam autem die, cum assellasset, dejecit quiddam rotundum, formam habens pomi, cum una radice, & solidum; Et quoties postea assellabat, egerebat sanguinem in magna quantitate. &c.

Sed quid opus est excurrere ad vetusta talia peregrina, cum domi suppetant recentiora. *Platonis* quondam Nostri æger, qui postmodum B. D. D. *Zellero*, Socero, Antecessori ac Collegæ Desideratissimo, thema dedit conscribendæ Disp. Inaugur. de *Molis virilibus mirabilibus*, conquerebatur etiam de dolore circa præcordia, & in regione ventriculi, vel,

luti comprimentē. Superveniebat eidem asthma, cum vertigine caliginosa, quin cœcitate tandem omnigena, atque gravi lipothymia. Comitabatur ista, dolore præcordiali nihil quidquam imminuto, alvi pigritia contumax, quæ, revertente scotomia, ac ingruente tandem convulsione epileptica, augebatur pertinacissima, injectionibus, tam lenientibus & emollientibus, quam stimulantibus, inunctionibus & cataplasmatibus, diu invicta. Tandem dejectionem optatissimam impetrasse ratus æger, pelvim sanguine aquoso, massisque pluribus, pro sanguine concreto habitis, semiplenam consternatus videt. Has, a sordibus paucis intermixtis, aqua sæpius affusa, deterfas, cum examinasset adcuratius,prehendit massas, tunicis singulis propriis, modo adhuc integris, modo dilaceratis, investitas, nequaquam saltim sanguineas grumosas, sed fibrosas carniformes, omninoque tales, quæ molis fœminarum, fœtus harum recenter editos comitari frequenter solitis, vel visceris alicujus parenchymati, compagine sua erant similimæ. Magnitudine quædam juglandem, aliæ ovum, aliquæ tamen pugnum quoque minorem, æquabant. Plures oblongæ, ventriculum, intestina referentes, molles omnes & lubricæ, sedibus diversis aliquot librarum pondus æquantes, rejectæ. Cessavit vero statim omnis compressio præcordialis, & , quamvis præter dicta toto quatridduo nihil excerneret, sub hujus finem tamen sponte iterum secuta fæcum naturalium copia, valetudinis restitutæ prodromus.

Quemadmodum vero molas hasce viriles mirabiles, post gravem adeo corporis perturbationem rejectas, non ex ventriculo, ut *Avenzoar*, sed ex intestino colo disp. cit. deduxit quondam *Socer* venerandus, atque adeo in memoriam mihi revocat quadrigam ægrotorum, quos in Dispp. suarum penultima, d. alvo hæmorrhousa, proposuit *B. Parens*: Opinari etiam facit, *Kerkringii* corpus glandulosum, 3. palmas longum, binos digitos latum, septemque uncias pondere adæquans, cum ingenti sanguinis copia, per alvum a fœmina rejectum, originem habuisse non diversam; Contra vero, *Riverii* vesicas farciminales, & *Warthoni* hydatides ibidem adductas, alterius plane classis esse, neque penitus huc spectare. Ita, quoad sedem & originem, ventriculo denegari forte minus poterit mola vomitu rejecta, quam Italus Medicus *Panarolo* communicavit, hisce verbis descriptam: Erat caro otiosa, informis, instar molæ a *Galeno* descriptæ; habebat nih-

hominis quasdam rudes delineationes, in rotunditate & figura pruni, cum ejusdem penicillo. Erat duarum unciarum pondere, spongiosa, carnem hepatis, colore & consistentia, præ se ferens. In superficie erat dura, & pellicula s. membrana forinsecus circumposita, mediam fere carunculam obvallabat. Temeritatis non minus ac fortunæ specimen dixerò, molam hancce carneam vomitorio fuisse provocatam, ex viro melancholico, propter hæmorrhoidum retentionem, copiosi sanguinis vomitu olim pluries, tunc autem ventriculi dolore intensissimo, qui nec anodynis nec narcoticis sedari poterat, gravissime vexato. Analogiam vero cum præcedentibus probat phænomenon tam concomitans, quam consequens: Sanguis nimirum ater, unius heminæ quantitate, simul rejectus; Et ægrotus adeo feliciter inde restitutus, ut *Willisius* optaverit, obtigisse hoc *Thoma Bartholino*, qui pro dignitate molam hanc & calamo pingere, & sermone posset explicare.

Quod in uteri, vel ampliore alio quocunque, cavo concretum molam aut sarcoma vocant, id in angustiori canalium & vasorum spatio, imprimis autem humorum libere undulantium flumine, succrescens *polypus* nomine insigniunt. Transeat onomatologia & differentia polypi, ex B. B. *Abavi* Memorab. Medic. Cent. XX. part. LXXVIII. atque *Avi* Disp. d. polypo narium aquoso, juxta cum Appendice E. N. C. Dec. III. Ann. I. haurienda. Transeat etiam ordinarius cordis, aut vasorum circa cor majorum, polypus, palpitationum & pulsationum mirabilium non minus ac terribilium promus condus, vel solo *C. Patini* testimonio, cujus polypum anevrysmalem, vel anevryσμα polyposum, E. N. C. D. III. A. I. App. cit. dedit *Knipsmacoppe*. Tria modo sunt, quæ occasione horum in transitu notabo paucissimis. Massa polyposa *Struvii*, per alvum excreta, quæ spiritamam longa, pollicem lata, membranoso carnea, multaque pinguedine intertexta, recensetur in Act. Phys. Med. N. C. Vol. I. O. CXCV. nobis in memoriam revocat corpora raphanoidea, i. e. massas solidas, oblongas, raphani figura & magnitudine, quas in anserum complurium intestino cæco, tam alterutro, quam utroque, deprehendit olim, & ad laud. Disp. d. mol. viril. mirab. communicavit B. *Parrens*, nullibi quidem intestinis adnatas, hæc tamen valde distendentes. Fuisse autem ipsis ibi dicitur substantia alba, non fibrosa, sed tunicata, bulborum instar in laminarum stra-

ta, five convolutiones, divisibilis. Quæ, quam convenient scum massa carnea vomitu rejecta *Fabri*, determinare non ausim; nimis enim Ille recensendo brevis fuit in E. N. C. D. II. A. IX. App. p. 456. Deinde in Act. Med. Berol. Dec. I. Vol. IV. dubitabatur: An *polypus* enasci queat etiam in *arteria aspera*? Debebat autem inservire ad explicandum affectum peregrinum, in trachea residentem, & per periodos maxime diurnas recurrentem, absque tussi tamen, vel puris aut sanguinis excretionem ulla. Exorto scilicet toties quopiam in arteria aspera fluctuante, & ad excutiendum, frustra quidem, adeo fortiter tamen irritante, ut suffocationis momentaneæ periculum immineret. Sed quid opus erat hæsitazione, postquam eorum non possibilitatem modo, sed actualem existentiam, exemplo dudum probaverat *Bartholinus*, in Act. Hafniens. Vol. V. O. XXX. Polypum Bronchiarum & Tracheæ sistens. Si exemplum velis recentius, evolve Act. Phys. Med. N. C. Vol. I. & lege modo laud. *Struvii* Obs. de massa carnea, instar venæ cujusdam, per tussim excreta. Tertio ex Act. Erud. Lips. Ann. 1715. Mens. Octobr. constat, natum etiam in *oesophago* fuisse polypum, vermiformem, sex digitos transversos longum, crassitie lumbrico majori parem, substantia carnofo fibrillosum, colore ex albo rubicundum. Hunc observatione singulari ab Amico communicatum, ac a nicotiana hispanica, quæ fortius adtracta naribus in pharyngem aliquando penetraverat, excitatum, diu varie, quin misere, frustra tractatum, ac in ægro fame sitique tandem enecto sectione deprehensum, dignum utique judicarunt Dnn. *Collectores*, quem, figuris æri incisis delineatum, actis suis infererent.

Dices: Quid ergo vel tandem superest? Resp. *Supersunt Abscessus*. Sed nec hi quidem omnes, promiscue. Etenim *Leonh. Fuchsius*, de Facultate nostra quondam bene meritus, atque ante hos ducentos annos Eidem adscriptus, proin dignus, cujus vel hac etiam occasione renovetur memoria secularis altera, suarum Instit. Med. L. III. C. XXVI. p. m. 637! Abscessus, inquit, duplex genus est; Unus, ubi phlegmone in pus conversa, pus ipsum, tanquam in sinu aliquo collectum, continetur. Alter, quum nulla præcedente phlegmone, humor aliquis statim initio in parte aliqua coacervatur. Transeat prior significatio, phlegmone in pus conversa, vel, secundum modernorum loquendi formulam, inflammatio apo-

stematodes, ubi manifestæ inflammationi præcedaneæ superaccedit suppuration, aut in hanc illa proprie loquendo terminatur. Posterior, quemadmodum etiam quidem abscessus, vel Tumor potius hodie vocatur cum folliculo, aut saccatus, ex eo quod, uti *Celsus* ait L. VII. C. VI. ex parvulo incipiens, diu paulatimque increscens, tunica includatur sua; Ita hic tandem hujus loci est, cujus classi noster etiam vendicari, proin adfirmativa demum hæcce thesis poni poterit:

Tumor nostræ fuit cum folliculo, vel saccatus. Tales prisci vocarunt olim collectiones paulatinas, in occulto natas, nec sub cute tantum, ut *Schelhammero* visum lec. cit. sed in omnibus ac singulis partibus nostri corporis obvios, prouti patet vel ex initio statim capitis penultimi, quod suo morborum chronicorum libro ultimo istis destinavit *Celius Aurelianus*. Differunt non saltim magnitudine, ac locorum varietate, sed imprimis etiam contentorum qualitate, atque conditione diversa. Primæ quasi magnitudinis illos dixero, quos historia medica nobis sistit abdomen e. g. adeo elevantes, ut pro asciticis ægri fuerint habiti. Talibus jam accenseri quidem poterit, in M. N. C. A. II. O. LXXXII. a *Schulzio* propositus, Tumor insignis supra ventriculi regionem, externe suppuratus & feliciter curatus; atque Ann. proxime seq. III. a *Car. Raygero* Obs. CCLXXXII. descriptus Abscessus ventris infimi, per umbilicum evacuatus; Cui parallelum in E. N. C. Dec. III. Ann. I. App. subjunxit *Lentilius*, observatum in viro, qui, alliso inter equitandum ad ephippii mucronem abdomine, tribus supra umbilicum digitis transversis, tumorem inde coepit sentire, nucis magnitudine primum, atque ideo neglectim habitum, postea vero hominis adulti caput brevi superantem, ac in alterum usque lustrum non sine molestia gestatum, maturantibus tamen ac emollientibus tandem feliciter apertum, ac puris incredibili copia prodeunte semestri spatio ita sanatum, ut aperta tamen maneret extus, inter epigastrium uc umbilicum, fistula. Quibuscum conferri forte poterit biga *Riverio* communicata, Obs. suarum p. m. 426. atque tumor peritonæi sacciformis in *Adenologia Nuckii*. Jure autem stricto fuisse talis dicendus, & agnoscendus erit, saccus abdominis feculentus, hydropem mentiens, quem in E. N. C. D. II. A. X. O. XLIX. recenset, &, præter 22. libras materiæ crassæ subflavæ, primo puri, dein ranarum spermati non absimilis, atque sex insuper burse.

burfulas aquam limpidam fundentes, ac in fundo gelatinam albam tenacem relinquentes, inanitum cum appendiculis suis, ac intus adhærente mucilage, adhuc 5 1. libras pependiine, scribit *Hunerswolf*. A quo parum abludit, quippe 47. libras æquans pondere, etiam simili prorsus materia repletus, saccus abs me notatus in *Act. Phys. Med. N. C. Vol. I. O. CLX.* una cum pluribus, in utraque hac observatione, atque *Disputationum mearum* prima, ibidem allegata, citatis.

Minores, quemadmodum pro contentorum diversitate vel servant abscessus nomen, vel alia fortiuntur nomina, vocanturque vel vomica, aut hydatis, sive meliceris, atheroma, steatoma, &c. Sic nostræ nunc sollicitudinis erunt objecta, ex innumero medicarum observationum numero, quæ cum themate quidem nostro forte propius convenire videbantur, decerpenda. *Abscessum saccatum* pectoris, in thorace militis gregarii deprehensum, *Act. Phys. Med. N. C. Vol. II. O. XVIII.* sic describit *Laubius* : Ad latera pericardii, infra pulmones, ab insertione costæ quartæ cum vertebris dorsalibus, usque ad septimam, saccus albicans, pugnum recipere capax, in cellulas distinctus pure repletas, integer in dextra thoracis cavitate. In sinistra similis, sed minor, pus in cavum pectoris fundens. Duos similes in mediastino, ad utrumque sterni latus, deprehendo notatos in *Sepulchr. Boneti L. IV. Sect. I. O. XIV.*

De *Vomica* non est, quod simus admodum solliciti, cum proh! dolor illarum exempla nimis quam multa prostant passim. Operæ tamen pretium erit, adducere unum & alterum, servato semper ad casum nostrum respectu propiori. Quod ex *Fernelii* pathologia *Bonetus* citat *Sep. L. II. S. I. p. 402.* quandoque post concitatiores corporis motum, pilulas parvas, vel globulos, pili magnitudine, membranula conclusos, a pulmone reddi, qui digitis contriti pus continent foetidissimum, quale vix e cavo corrosoque putri dente expurgetur : Quin adolescentem quempiam, cum ab exercitatione fortiori torqueretur etiam tussi acerbiori, nullo temporis puncto intermisso, tandem excrevisse vomicam integram, ovi columbini magnitudine, in qua aperta pus exquisite album & æquale deprehensum fuerit ; Id utrumque etiam inter nos contigisse novi. Et prius quidem in praxi propria observavi, talesque globulos a Viro cæteroquin robusto, hactenus hypochondriaco magis quam phthifico, nunc levi tussi, frequen-

tius saltem modico scretu obtentos, non semel examinavi, talesque omnino, quales modo diximus, deprehendi. Alterum ex praxi B. Parentis sui pronuper mihi retulit Exc. Dn. D. *Mauchartus*, Adfinis & Collega Honoramus, de viro med. æt. diu sicce tussiculoso, ex ignota causa vehementer aliquando ad extussendum tandiu irritato, donec tandem summo cum impetu, nec sine credito suffocationis periculo, in aream hypocausti projiceret massam rotundam, ovalem, ovo gallinaceo proxime comparandam, sed membrana tam robusta tectam, ut, nullo manuum robore rumpenda, pedibus denique fuerit conculcata, sed foetorem abhinc in conclavi excitans intolerabilem.

Hydatides in ventriculo humano repertas ita describit *Cleyerus* E. N. C. D. II. A. I. O. XVIII. Deprehensus fuit ventriculus fere plenus corpusculis oviformibus, rotundis, diversæ magnitudinis, innumerabilibus. Horum exterior membrana erat valde tenax, & lenta. Intus vero continebatur liquor flavus, instar lymphæ. Et in fine istius anni p. 451. de eodem (uti quidem videtur) casu subjungit: Nonnulla horum magnitudinem æquabant ovi gallinacei. Dum in figura observationi cit. adjecta conspicerentur etiam pilularum nostratum ac pisorum æmula. Egregie conspirant hæc, et iconibus additis quoque conveniunt, cum Obs. XXVII. *Ruysschii*, qua hydropem e congerie hydatidum sacco conclusa descripturus, recenset vesicam bursulis aqueo humore refertis infarctam, aut saccum membranaceum crassum, & magnitudine stomacho non absimilem (supra quem etiam locatus erat.) hydatidibusque repletum; idque in cadavere asthmaticæ, cui respiratio erat difficilis, ut ex orthopnoea nonnunquam videretur moritura, concomitantibus febricula lenta & cardialgia frequentiori. Harum hydatidum multas in sacco dicto fluctuasse, alias autem firmiter eidem adhæsisse, subjungens.

Mitterem hydatides, nisi aurem vellicaret annosa *virgo*, oppido rara, atque prorsus inconsueta, rejectione anoterica diuturna vesicularum talium, tam parvularum, pisi saltem, quam majuscularum, ovi columbini magnitudine, quarundam inanium, tubulo quovis facile inflandarum (procul dubio, quoniam prius intra pectus ruptæ) plurimum adhuc liquore suo limpidio turgentium, levi scretu facile, interdum magno numero, obtentarum, non minus ac sanitate recuperata, cum morti tum non semel crede-

crederetur proxima, notatu certe dignissima; In] memoriam n] ihi revo-
cans, tam Observ. XXXIII. atque XXXVI. Sect. I. L. II. ex Sep. *Boneti*,
fide quarum in Cardinalis *Cajetani*, atque nobilis *Burgundi*, cadauere
inventus fuit pulmo plenus istiusmodi vesicis, humore consistente lento-
que & pellucido, instar albuminis ovi pręgnantibus; Quam *Hepatitis*
singularem, stupendo hydatidum parvularum, sed nec paucorum majorum,
ovum gallinaceum magnitudine æquantium (quę omnes, utre peculia-
ri comprehensę, in media hepatis substantia delituerunt.) numero
formatum, atque juxta cum aliis in sectione phthisici veterani aliquando
reperitum.

Reliqua uno paragrapho comprehendere, & strictim modo bre-
viter percurrere, atque adeo ad finem properare, tandem utique licebit.
Transeat ergo *Meliceris* viridis *Rhodii* Cent. III. Obs. LXXV. Transeat
etiam *meliceris* pręgnans, vel pilis, qualem non *Hoffmannus* demum
in E. N. C. D. II. A. V. O. CCX. sed jam dudum *Celsus* observavit;
Vel alia *meliceride* juvencula, non minus folliculo suo inclusa, quod te-
statur *autoptes Petrus de Marchettis*. Non enim cum *Æsopi* ranis] apud
Phædrum sollicitus inquiram: *Quid futurum est, si creavit liberos?*
Multo minus disputabo, num pro talium liberis haberi debeant animal-
cula, culicibus muscisque parvis similia, quę *Philoxenum* in istis obser-
vasse ex *Ætio* refert *Schelhammerus* l. c. Neque lucis multum fœnerabi-
tur tam *Atheroma*, vel renale *Valentini* in E. N. C. Cent. III. & IV.
O. II. vel sublinguale *Dolei*, earundem Eph. D. III. A. II. O. LXXVII.
aut Hepatis, *Blancardi* Anat. pract. Cent. II. O. III. Omentive, Act. Erud.
Lips. cit. Ann. 1715. M. Jul. (Nisi forsan occasione hujus, atque illorum
A. 1706. M. April. recensitorum, *meliceridi* prius dictę controversiam
status] aliquis movere velit cum *Ætio*, prætendente, non in] tenuiore hu-
jus, sed in crassiore illius, humore talia existere.) Quam *Steatoma*,
vel illud *Diaphragmatis*, a *Veslingio* Synt. Anat. C. IX. vel alterum in ca-
vo pectoris, a *Laubio* in E. N. C. Cent. VII. & VIII. O. XL. aut in py-
loro uris] a *Franco* M. N. C. A. IV. & V. O. CI. sive in mesenterio a
Lechelio E. C. D. II. A. II. O. CLIX. & Exc. *Verdriesio* Act. Phys.
Med. N. C. Vol. I. O. LXXXVII. propositum, æque ac illud *Merck-*
lini Dec. II. A. VI. O. CCXXI. & *Wurfbeinii* Dec. II. Ann. VII. O.
CCLII.

CCLII. vel sterilis, super aortæ steatoma cum polypo confusum, in Act. Med. Berol. Dec. II. Vol. V. agitata controversia. Pertæsus enim observationum ultra cumulandarum, quibus certe satis omnino, si non nimis, datum est, ad illud potius me confero, quod palmarium est, tumorem concernens nostrum, ex hactenus adductis nunc illustrandum.

Adparet autem ex omnibus, quam non sine fundamento dixerim, me tumorem nostrum adhuc hodiernum mirari potius, quam penitus perspectum habere. Etenim quam certum est, excretum illud, a foemina dictum quasi sine testa ovum, pertinere utique ad tumores cum folliculo, vel saccatos; Tam dubium est & manet, ad quamnam eorum speciem referri, ac ubinam hæsisse, undenam venisse, dici debeat. Hydatidem non vocabis, quia neque lympham, neque serum tenue continuit membrana spissior. Abscessum, vel vomicam, vocare non poteris, quia puris nihil habuit, nec ullum inflammationis signum unquam præbuit. Meliceridem, vel atheroma, dicere ita simpliciter vel ideo non possum, quia neque melli inspissato, neque pulti, vel miliaceæ vel avenaceæ, sed aceti quam vocant matrici comparavit mulier, de istis omnibus interrogata, istarum vero pulricularum bene gnara. De steatmate sollicitus esse superledeo, quia pinguedinis sebaceæ nihil adfuit. Si tumores cum folliculo haberemus gelatinosos, qualem pro hernia habitum in inguine pueri rhachitici, ac alterius asthmatici, deprehendit *Reiseli*, juxta E. N. C. D. II. A. VII. O. XI. p. 20. 21. 23. facile subscriberem. Sed nihil quidquam ibi de folliculo.

Quid ergo? Si, recedentes tantisper a sententia communiter recepta, vel Vomica sine purulenta, vel Meliceridem sine mellaginea substantia intus contenta, statuamus etiam repleri posse istiusmodi mucoso, glutinoso, viscido, tenaci concremento? Ubi, quod vomicam quidem concernit specialius, quamvis non ausim statuere, nec ex inflammatione præcedanea omnes fieri, (quæ olim Calii Aureliani fuit sententia, prouti patet ex cap. cit. quo, de curatione illarum locuturus, præmittit indicationem prophylacticam, paucis hisce verbis comprehensam: Sed oportet ob earum (vomicarum) generationem fugiendam congruam tumoribus (partibus inflammatis, uti legendum Ammannus recte notat in margine.) adhibere cura-

curationem. Horum enim augmenta collectiones faciunt generari, ut sæpe in pleuriticis vel peripnevmonicis, vel similibus morbis, quibus ita formavimus curationes, ut minime sinantur initia fieri vomicarum.) Nec verum pus generari absque inflammatione, vel comite vel pedisequa, qualitercunque lenta, tarda, quæ in occulto fieri, adeoque Medicum, non minus ac ægrotum, sæpe diu latere possit: Vomicam tamen hujus generis *absque omni inflammatione*, meliceridis instar, & oriri & augeri, gestarique diu posse, totus arbitror.

Neque melior est conditio *Subjecti*, vel loci affecti, in quo tam diu hæserit, ex quo avulsus proruperit nostræ tumor. Laud. *Calius Aurelianus* cap. cit. inter alia occupatur etiam recensendis vomicarum signis, secundum seriem partium, quas occupare ab initio capitis dixerat, essetque omnino pretium operæ non nullius, examinare secundum ista singula historiam nostram, nisi nimium incresceret disputatio. Præstat igitur ad fontem ipsum *Leet. Ben.* ablegare, & quod hic inprimis in quæstione est, paucis expedire. Quemadmodum penetratio dimensionum non datur; de susceptione autem ac translatione puris successiva, ex uno loco in alium, non agitur: Sed de folliculi totius exclusione simultanea, & maxime improvisa, quæritur; Proin quæ de corde, pulmonum superficie externa, diaphragmatis facie vel supera vel infera, mediastino, pleura, peritonæo, vel etiam ventriculi convexo, aut parte quacunque alia, nasci forsan alicui potuisset suspicio, omnis excluditur. Sic vicissim, de *pulmonibus* saltim ac *ventriculo*, inprimis quæritur: Utri horum sedes, atque terminus a quo, tumoris nostri, per os ita subito rejecti, adscribi possit? Pro *pulmonibus* semper stetit ac pugnavit fœmina, nunquam vomuisse, sed extussisse, & ex pectore rejecisse hunc quasi fœtum volens suum. Quodsi autem ipsi contradicere liceret, eruptionem facilius e stomacho, quam pectore, conciperem, atque phænomena tumoris, pulsationis, gestationis ac decubitus, maxime vero eruptionis ac liberationis, explicarem.

Etenim, quod ex *ventriculo* sursum fertur, etiam per os prodit, æque ac illud ex pulmone veniens. Incurvatione autem corporis antrorsum, ad committenda terræ sua phaseolorum semina profundius facta, ac diutius

continuata, tam ab epigastrio tam diu tumido diaphragma sursum tolli, thoracis cavum angustari, pulmonibus semet expandendi spatium adimi, ac ad fortiter tussendum thorax irritari: quam sub & ab hoc ipso actu folliculus, pedunculò forte gracili, ut quandoque solent istiusmodi tumores laccati, non autem lata basi hærens, a ventriculi fornice rumpi (atque huius rupturæ vel avulsionis sensum sub ipsa tussi foeminam habuisse, in historia dictum est.) ac ab ipsa tussis vehementia, concurrente simul hoc ipso ventriculi hætenus inquilino, nunc compedibus suis recens liberato, vomitus excitari, atque per hunc ille rejici egregie potuit, foemina præ tussis vehementia vomitum simultaneum vel ideo non animadvertente, quod, scenæ adeo subita mutatione percussa, mentis oculos potius converteret in materiæ rejectionem, & corporis inde liberationem adeo momentaneam.

Cum hoc excernendi modo, atque tumoris loco prius dicto, ac adhuc specialius statim indicando, melius etiam conciliari potest *absentia tussis ac dyspnoea* omnis, per triennium gestati tumoris, etiam sub morbis in historia recensitis, ac descriptus in eadem ultimus excretionis actus mirum quam facilis. Comprehendere enim vix quisquam poterit, quomodo tumor adeo magnus, utriusque manus vola non capiendus, intra pulmones, etiam supremos, (ne dicam inferos) tam diu hære, tandem vero simul & semel ex illis totus prodire possit, absque notabili difficultatis in respirando sensu, aut excitata sensim, vel a corporis motu saltim sustinenda, tussi sicca, atque sub illius transitu per arteriam asperam, non adeo ut œsophagus dilatabilem, ullo suffocationis, imminere forsan a foemina creditæ, vel sensu vel periculo.

Accedit tumoris, etiam externe visi, tactuque toties explorati, *locus*, allegatum in historia epigastrii medium, sub ipso cordis scrobiculo, ventriculi supremæ fornici, ad quam, inter utrumque illius orificium, hæsisse potuit, potius respondens quam thoraci, & in huius non medio, sed latere utroque, pendulo pulmoni.

Favet hypothesei etiam *eventus*. Quemadmodum nihil quidquam, vel sanguinei, vel purulenti, unquam in sputo comparuisse, aut tussis remansisse.

mansisse: Potius foeminam quasi miraculose, momento temporis, plenarie & constanter, adhuc in vinea, liberatam & fuisse & mansisse, dictum fuit in historia. Sic hæc omnia quadrant in ventriculum potius quam pulmones, tantam tam diu, prius extensionem atque compressionem, deinde avulsionem, evacuationem atque subsidentiam simultaneam, non adeo impune sustinentes.

Pauca restant, brevissimis expedienda. Quod mali concernit *originem*, ego quidem allegatæ mariti potius, quam conjugis, causæ occasionali, nimirum *ponderis levationi* & gestationi fidem adhiberem, hanc ad inferendum tale malum potentiolem reputans, quam emanationem quidem mensium. Non obstant *Harderi* rustica superius allegata.

Specialem *tumoris formationem* atque genesis lubens transmitto, & de hac sollicitos ad systemata nostra, tam medica quam chirurgica, vel *Severinum*, *Meibomium* & *Schelhammerum*, de abscondita abscessuum internorum natura primicerios, remitto. Quia tamen vasorum nec multa nec magna habuisse videtur folliculus, conflictui reservabo, quam convenient, quæ de tunica allantoide scripsit *Bartholinus* Act. Hafniens. Vol. V. O. XLV. sub tit. *Novi Generis Fenestra*.

Pulsatio, quemadmodum dicta fuit non tam tumoris ipsius, quam potius peripheriæ circum circa; Sic in memoriam nobis revocat, quod inter signa collectionum talium generalia posuit *Celius*, scil. dolorem *pulsuofum*, præter inflammatorios abscessus, etiam in hisce chronicis locum utique habiturum.

Quæ de *decubitu* foeminæ dicta sunt, egregie illustrantur ab illis, quæ de puero suo asthmatico refert *Reiseli* loc. cit. Scil. illum asthma suum sensisse levare, quando stans caput atque pectus inclinabat scamno, forte quod *cor* oppido magnum ita *sterno incumbens* melius quieverit.

De *Therapia* nihil addam, quia bona fide fassus sum, me tumorem non curasse; *Naturam* hic fuisse sui ipsius *Medicatricem*. Sed nec discere multa licuisset pro tumore nostro ex *Therapia* illorum generali, quam ad Obs. CVIII. E. N. C. D. II. A. I. in Scholio dedit *Muraltus*.

Conflictus tuo tempore docebit, quam *Εγχευεια* hæc nostra, atque resolutio casus medica, ad palatum Lectoribus futura sit. Si qui fuerint, quibus non arridet, illi recordentur ejus, quod apud *Calium* l. c. legitur: *Sed harum eruptionum omnium plerique alias rationabiles dicunt, aliquas irrationabiles.* Et paulo post: *Sed non oportet de his plurimum disputare. Sufficit enim ad disciplinam significationis faciundæ, manifesta cognoscere & comprobare.* In quo & nos acquiescimus.

T A N T U M !

SOLI DEO GLORIA.

CLARISSIMO DOMINO CANDIDATO
RESPONDENTI

ΧΑΙΡΕΙΝ ΚΑΙ ΕΩΠΡΑΤΤΕΙΝ

PRÆSES.

PRO spatio superflite desiderat aliquid Typographus. Quid autem adcommodum magis excogitari posset Tibi, praxin medicam interea domi feliciter auspicanti, quam commendare sedulam pagellarum, ita successive Tibi transmissarum, non perfectionem modo, sed imitationem, adeoque Theoriæ atque Praxeos medicæ conjunctionem felicem. Scilicet a libris ad lectos, a Professoribus ad ægros dum nunc transis, priores tamen necdum debes deferere, sed ab ægris ad libros iterum Te conferre, ac præceptores istos mutos diligenter consulere, ut hæreditatem, quam nunc adgrederis amplissimam, non in usus modo Tuos convertere, sed propriis etiam observationibus auctam posteris aliquando tradere liceat. Cæterum felix hoc, tam studiorum academicorum, quam anni labentis, complementum, Tibi non minus ac Honoratissimis Parentibus Tuis gratulor, ac ut omnia, imprimis vero Praxis Medica, ex voto semper fluat, ex animo precor! Scr. e mus. XV. Calend. Januar.

MDGCXXXIV.